

奏疏存藁卷之六

目次

備陳官兵偏苦情形疏

報明量帶官兵赴省疏

報明已抵雲南省會疏

備陳三事蚤期蕩平疏

恭謝 欽賜書經解義疏

恭報得獲滇省外護情形疏

恭報克復雲南省城疏



南服已靖再請休致疏

題報發回秦省官兵疏

報明前赴曲靖疏

題報起程進京日期疏

請明先後進京日期疏

請敘入川官兵功績疏

請敘平滇官兵功績疏

竭効愚忠疏

恭謝世恩疏

欽召赴京恭陳下悃疏

奏疏存彙卷之六

備陳官兵偏苦情形疏

密題爲官兵萬分苦難臣心痛如焚割謹報明情形仰祈

睿鑒事康熙二十年七月二十八日奉定遠平寇大將軍固山貝子等諭帖內開欽命定遠平寇大將軍固山貝子欽命征南大將軍都統賴諭勇畧將軍總督趙良棟知悉爲遵

旨事准兵部清字咨稱議政王等會覆疏稱康熙二

十年三月十六日奉

上諭據建威將軍佛尼勒報稱瀘州江對岸所扎之賊已經敗遁總兵王用予將官兵分爲兩路已經追勦等語今大將軍貝子章泰大將軍賴塔等大兵已抵雲南省城大敗逆賊不久卽恢取會城所有敘府汛地逆賊胡國柱王緒黑邦俊等必致逃遁如胡國柱等逃遁將軍佛尼勒趙良棟等卽行統領大兵追殺逆賊毋失機會其將軍噶爾漢總兵官王用予等亦統領官兵速赴敘府乘勢勦滅

逆賊至於敗遁之賊若不速行追殺致失機會應以違誤軍機治罪着議政王貝勒大臣會議具奏等因欽此欽遵該臣等會議得今敘府等處逆賊勢已甚迫驚潰顯然

上諭最爲允當應宜遵行限文到將軍佛尼勒趙良棟等將潰敗逆賊定行窮追務宜勦滅若示以怯懦退縮不行窮追勦襲照以坐失軍機例從重治罪其將軍噶爾漢總兵官王用予等亦以文到之日作速前赴敘府毋失機會窮追勦滅

可也倘若遲滯觀望有誤機會亦照違誤軍機
例從重治罪其將軍紀哈禮作速趕赴將軍趙
良棟協同前進等因於康熙二十年三月十六
日題本日奉

旨依議速行等因到本大將軍等但本大將軍等兩
路大兵已會一處圍困雲南省城可無虞矣今
據投誠鶴麗將軍李發美報稱逆賊胡國柱等
統領殘逆離麗江三十里扎營等因照得麗江
鶴慶俱已歸誠爾等大兵奉有窮追逆賊胡國

柱之

俞旨應宜尾隨追勦可也特諭八月十一日又奉諭
帖內開欽命定遠平寇大將軍固山貝子欽命
征南大將軍都統賴諭勇畧將軍雲貴總督趙
良棟知悉爲陳明情形仰乞

睿裁事查得先據各處陸續啟報內開原在貴州僞
將軍高啟龍回雲南開化府僞將軍夏國相儂
鵬僞李將軍王將軍二楊將軍已往雲南廣南
府僞將軍張足法扎在山內有四川瀘州僞將

軍李思敬僞趙將軍亦回李思敬赴雲南阿迷州僞將軍馬寶已至黃龍洞僞將軍胡國柱王三將軍黑將軍王將軍尤將軍等俱領兵回烏蒙路上僞將軍劉魁李芳春已出雲南蒙自縣現扎馬遼河等情除將臣等現在之兵圍困城池及四面征勦逆賊誠恐分兵兩處勢力單薄故題

請貴州大兵今貴州大兵已至後因馬寶率領各僞將軍等逆賊竊據楚雄而投誠之將軍陳廣祿

已迎降逆賊臣等會議卽令都統希福提督桑格等率領滿洲綠旗大兵前往擊敗逆賊殺首殺擒者擒僞將軍馬寶巴養元趙國佐鄭旺李繼業等俱已投降今夏國相等殘逆已不成隊遊散廣南府有胡國柱等雖統逆衆前奔鶴慶麗江一帶未及勦滅而都統希福提督桑格統領滿洲綠旗大兵躡踪追勦其四川調來之將軍紀哈禮總督趙良棟等大兵亦應遵旨尾隨窮追撲勦等因已經移文其餘僞將軍等已

一二陸續投誠將完今僞逆情形不同前局而臣等軍前現在所有滿洲綠旗兵力似亦克足今據報稱將軍噶爾漢總督哈占等兵於七月二十五日已至貴州威寧等因復據總理大兵糧餉學士佛倫侍郎金欽雲南巡撫王繼文等口稱此項大兵若俱至雲南需用糧餉甚多但雲南並無水路可通肩負米糧僅足供現在滿洲綠旗大兵如四川滿洲綠旗大兵俱到恐拒敵日久米糧不接前後大兵俱致懸釜關係最

大等情臣等會議得陝西總督哈占統來綠旗大兵俱令仍回四川陝西其將軍噶爾漢等滿洲大兵到滇之日臣等及將軍噶爾漢等大兵內將苦獨力頂補缺額甲兵酌量查汰其數另疏具

題如此則糧餉不致多費而困城之兵似亦克足矣故臣等一面行文陝西總督哈占止其前進之兵伏祈

睿裁卽

勅下總督哈占遵行爲此密

題謹題請

旨合行諭知特諭於八月十四日又奉諭帖內開欽命定遠平寇大將軍固山貝子欽命征南大將軍都統賴諭勇畧將軍趙良棟知悉據振武將軍覺羅紀哈禮啓稱前在建昌因官兵乏糧甚急馬匹倒斃三分之二俱係步走疾病者甚多已經具

題又因進勦雲南關係緊要不論官兵有馬無馬

將建昌所有之米支領十日口糧隨帶起身前進至金沙江一百二十里離溪站地名扎營看得官兵自雅州深入進勦山路崎嶇每日淋雨官兵馬匹倒斃甚多現今步行疾病者亦復不少今欲過江止有船一隻令將軍總督趙良棟綠旗兵丁先渡官兵已經絕糧十有餘日不曾得米現在饑餓未奉貝子等令諭之先官兵離金沙江一百二十里扎營其官兵絕糧十有餘日之處請貝子等查照或將金沙江附近府州

縣給糧或有召買之米運過江岸接濟官兵前
已具啓但本都統等官兵深入進勦未曾休息
兵丁馬匹已完且兼病者甚多俱係步行勞苦
已極萬不能躡踪胡國柱尾隨追勦前赴麗江
鶴慶等情到本大將軍等據此查得前奉有該
都統官兵尾隨逆賊胡國柱之

旨前已行諭躡踪追勦在案四月初八日准部咨內
開具報逆賊胡國柱等已經敗遁窺此大兵圍
困雲南省城逆賊胡國柱等回雲南救援是實

其在四川將軍等所行統領滿洲綠旗大兵窮
追逆賊無使奔至雲南勦除可也等情又據都
統希福等啓稱逆賊胡國柱等不得渡江在白
沙葡萄酒灣下營勢急或復回鶴慶或復往劍川
此必由之路等情據此照得逆賊胡國柱等勢
不能往蒙古矣回來乘釁竊據府州縣城池亦
未可知若此則逆賊復致緩延騷擾地方該都
統等大兵馬匹如甚不堪挑選堪用者仍遵前
旨躡踪窮追其馬匹不堪兵丁酌量留在一處稍爲

休息亦令隨該都統兵後進勦乃合軍機本大將軍已行令都統希福提督桑格等必尾隨窮追逆賊矣該都統等彼此相通聲息兩下夾勦務宜盡除根株事關軍機慎毋違

旨至於啓稱將金沙江附近州縣給糧運過江岸接濟官兵但雲南並無水路現今圍困大兵缺乏米糧如此項官兵若至雲南恐前後大兵盡皆懸釜等因已行諭總督哈占帶領綠旗官兵酌量駐劄候

旨外合行諭知特諭等因到臣查臣原統一路官兵於康熙十八年十月初二日自清水縣起行進勦十日而取徽州十日而取成都可謂迅速四川爲雲貴門戶四川一得則雲貴不能守而湖南之賊自不敢立兩粵反覆不定者定矣理勢所在難掩

聖明雖首倡在臣分當竭力然浮江破賊勇往先登直取省會者實出官兵之力也及瀘州失守永寧再陷賊自何來誤從何起爾時逆渠鴟張全

川震動叛賊蜂起人心洶洶勢在不保臣期以身殉誓以死守矢保四川否則幸災樂禍以應其口者誰不願四川之不保以快其心又誰思及不顧敘府者自有其人棄川不守者自有其人痛臣孤忠孑立爲衆所忌泣血仰告者惟天日恃以保全者惟

君父同心合力奮不顧身助臣滅賊者官兵也至臣若不去夾江峩眉嘉定犍爲沐川司一帶追賊大敗渠魁於觀音崖三倒拐新鎮等處殺入蠻

地則敘府不能保而胡國柱等逆自在四川若不急攻關山象嶺克取黎州直抵大渡河覆賊全軍而蔡國明于登明戴聖恩等六千賊衆尚在黎州胡國柱尤廷玉王公良等據守建昌賊兵如何得散且王緒李匡過江扎姚安取武定馬寶拒楚雄連洱海逆賊犄角爲勢自是堅心拒敵土司觀望迤西反覆雲南安能無慮耶臣抵建昌接准部文係大將軍貝子等言楚雄復叛雲南圍城兵單四川大兵並無到來之信賊

寇俱專力雲南奉

旨行催速進臣遂不敢等候繼運之糧督兵起行不
但官兵斷糧乏食忍饑跋涉更際霪雨連綿江
河暴水不能急渡又上山則惡石陡險下山則
泥深數尺人病馬倒死亾枕藉慘不忍言及抵
金沙江又無船隻又無糧米官兵惶懼人情緊急
急臣正在沿江尋船過渡間而大將軍等文到
令去迤西跟尋胡國柱在各兵將忍饑勉力徒
跣跋涉所盼者過江所望者雲南一聞此信紛

紛不安竊思官兵者皆係

朝廷之官兵地方者皆係

朝廷之疆土逆賊者總爲叛

國之逆賊到何地方自應何地方官兵追勦安有
等待之理原無疆界之分况胡國柱來自湖廣
非起於四川旣到雲南大將軍貝子等已遣將
軍臣希福提督臣桑格躡踪追勦官兵不少勢
窮之賊可以成擒不必又令遠來極疲久饑之
兵驅之跋涉且隔越日久自是遠不及問如賊

勢尚在或據有城池二臣請兵亦當分遣先到之兵已喂之馬將遠涉甫到之疲兵弱馬分派圍城少示休養總是爲

國出力其病兵癘馬亦得少就醫藥若舍已經休息之兵已經喂養之馬不遣而遣疲兵弱馬不獨情理不順抑且徒延時日究無實濟再如奉旨追賊乃係在川槩行嚴飭在三月內之事也非言一人非指一路奉

旨進定雲南係大將軍等以雲南兵單請兵速進新

奉

旨 在六月內之事也

旨有前後事有輕重吳世璠僭號稱帝省城未下自是重大而胡國柱不過一奔逃窮寇耳不足輕重三路官兵急宜合力共取雲南吳世璠就擒人心自定則胡國柱又將焉往至臣等一路滿漢官兵由川入滇蜀道之難不毛之地而關山象嶺大渡河金沙江瘴癘正發霖雨不止更苦無糧戰爭勤苦顛危備嘗卽今過江而衣甲馬

匹什物帳房鞋脚不全者多半漢兵如此滿洲之苦更甚人人可見處處可問已到者如此未到者尚不知是何景狀委果疲苦實難再去遠征且胡國柱可擒則希福桑格二臣在前已擒報功矣如其去遠則前躡踪尾隨官兵尚不能追賊而疲兵弱馬相隔一月之期又安能及時追賊耶官兵先到後到總是奉

旨道路不同時事有異且賊來自何方去出何地勝敗有因豈可不論三路滿漢總爲

皇上豢養之人進定雲南總爲

皇上特命之

旨豈可兩視但大將軍等接踵三文又稱前後大兵俱到必致懸釜關係最大等語是立意不容前去矣臣係何人豈不自揣敢於與大將軍具上等爭論只得將官兵疲苦已極之情形馬匹狼狽之形狀雲南果否的係不用官兵之處一一備敘再請大將軍等確示如必欲令去迤西切慮疲極之兵再難勉勵勞弱之馬再難馳逐抑

恐偏苦之衆怨尤易生而什物帳房衣裝鞋脚尤須急急置備方可禦敵馬匹必須喂養方可遠征請將官兵歷過之月壓欠之餉補給令各兵自行置備抑在何府州縣收拾至總督無才自揣不能勝任業已具疏懇辭然尚未奉有俞旨今旣入滇應否赴省有無責任并請裁酌尚不知大將軍等是何主見作何示下今將軍臣紀哈禮統領滿兵赴省郎中臣額爾克圖亦已隨兵前去查武定係赴省去迤西適中之地臣暫

扎候示所有前後緣由臣不得不統敘備陳仰懇

聖明乾斷臣固知雲南功罪爲大胡國柱得失事小在臣勉勵官兵進定雲南至武定者遵

旨報効而相距百里不敢遽然抵省者又因不敢有違大將軍貝子命令總是尊

君敬

主切重封疆也伏乞

皇上電鑒孤忠慈憐下情而臣老病日劇勞怨日深

實難支持准臣前疏之請放臣生還官兵偏若
與在陝入川未來雲南者稍加分別

恩准休養微臣幸甚官兵幸甚緣係備陳官兵疲極
情形貼黃難盡伏乞

皇上睿鑒全覽

勅議施行康熙二十年九月十八日奉

旨議政王貝勒大臣會議具奏

報明量帶官兵赴省疏

密題爲微臣遵行量帶官兵赴省謹報明緣由并
起行日期仰祈

睿鑒事竊照臣等於本年七月二十二日師抵金沙
江三奉大將軍貝子等諭帖令臣等一路滿漢
官兵前去迤西跟尋胡國柱除滿洲官兵先行
赴省而臣暫扎武定將漢兵情形備敘具文差
官赴大將軍等軍前報明請示業經

題明在案今於九月初十日據原差總兵馬山筆

帖式福保等回營并帶大將軍等回文着將官兵安插於武定就糧令臣量帶官兵赴省將糧餉機宜公同會商酌奪等語臣謹將大眾官兵安插於武定祿勸羅次三處責令總兵李芳述趙弘燦副將雷繼宗等統領就糧臣量帶官兵同總兵馬山偏圖等於九月十一日自武定起身赴省外所有官兵安插情形并臣起行日期相應先爲

題明伏乞

皇上睿鑒施行康熙二十年十月初六日奉
旨該部知道

報明已抵雲南省會疏

密題爲恭報微臣量帶官兵到省日期事查臣前
遵照大將軍貝子等文行量帶官兵赴省緣由
及起行日期并留兵武定安插情形俱經

題報在案今臣於本月十六日抵省其一應軍機
并武定等處暫留就糧大衆官兵應作何遣發
均候大將軍貝子等酌定另疏具

題外所有微臣到省日期理合

報明伏乞

睿鑒施行康熙二十年十月十三日奉
旨兵部知道

備陳三事蚤期蕩平疏

密題爲報明官兵并請大沛

寬仁蚤奏蕩平事案照將臣原帶進滇一路漢兵止
留五千其餘盡數發回陝西出大將軍貝子等
暨諸叅贊公議又令臣一面具

題一面徑自發回不必候

旨而臣遵照衆議業已繕疏

報明矣至所留官兵五千名於九月二十二日已認
壕墻汛守訖查臣於九月十六日抵省十九日

會議臣曾備言三事於大將軍貝子等暨諸叅贊之前而督糧學士侍郎內院諸臣俱在坐聽一自新之路宜開也臣謂投出之人當善爲安插不當分散爲奴如其分散爲奴稍有廉耻血氣者必不肯自辱其身是我塞其向化之門絕其擒渠獻城之路反爲逆賊助力矣一急請近城扼要爲切務也臣謂圈圍太遠不獨容賊於寬地採海菜捕魚蝦收草籽可以延生卽有思歸反正內變者以我兵旣遠自不敢舉動矣一

壕牆當嚴當慎也臣謂每日四面出入壕牆尋柴割草者何止萬人查米價隔一壕牆一倍十倍小人止知獲利旣無稽查焉保其無弊若今歲不速取城明春勢必無糧并譬論遲速利鈍等語爾時大將軍等深然其說諸叅贊亦皆首肯及其實行議論人多疑信不一我

皇上神明高遠自有

天聽臣亦不敢繁

瀆逮至十月初六日大將軍等復集會議宣讀清字

部文又令院臣漢語譯說欽奉

上諭急取城池仰見我

皇上聖明洞照萬里而臣請再留陝西兵五千合爲一萬情願前進効力大將軍等依允遂議定俟調到武定之兵留四千守壕牆六千臣親身帶領進取重關不期不待調兵次日又復更議今於十九日又議定臣之官兵去南壩取土橋進攻東寺三市街雖大將軍言定而臣與官兵實出情願不當瑣陳惟是臣之一路漢兵前

題明發回今復留用均未請

旨大將軍貝子等旣未具

題臣不得不再爲聲明也至分人一節或係奉

旨應分或有定例應分臣均不得而知今圍城旣久可謂師老糧匱且地方殘壞已極今歲藉秋成之半尚可支持若至明春兵糧勢必艱難民食勢必無出以雲南有限之地有限之民爲逆賊蹂躪七八年其間橫徵暴斂民不堪命者久矣今四路滿漢大兵苦獨力以及在營婦女幼小

并各省生理貿易之人何止四五十萬日費何止四五千石糧米出自滇南一隅之地恐搜刮殆盡來春不免饑荒再查順治十五年三路大兵進滇李定國未敢拒守城池大兵旋撤一半回

京次年米價三兩七八錢一斗三十七八兩一石楊林易隆馬龍曲靖一帶人自相食彼時臣在進兵身親目覩者可謂前鑒不遠臣固知圍困已經八箇月城內無糧逆賊勢餒自不能久或

不出冬月前後在大將軍等深籌預料自能周祕且官兵征戰七八年挑壕之後人自應分而臣淺見謂若不開向化之路逆黨勢必拚命并力死守倘攻城急切不下不但米糧未絕馬匹尚有數千卽人自相食猶然拒守順治六年大同有之矣萬一涉此賊可食馬食人而我之官兵來春無糧又當何如况迤西地方已不堪問此臣憶前慮後疾首痛心不能自已者又不得不備陳於我

皇上之前仰懇

聖明乾斷立賜拯救也臣愚以吳世璠郭壯圖罪在

不

赦其餘黨類及被脅頭領槩准免罪有能擒渠獻城

者遵照前

旨尚可論功而一應投出之人無論兵民不許分散

爲奴

聖恩旣寬人人得其自新之路使城蚤開一日活無

限之生靈省無限之民力且吳世璠郭壯圖完

全就擒我

皇上詔告天下通傳外國何等寬仁何等正大倘必

待事極生變水盡鵝飛或於灰燼處尋尸無對

證處問信究有何益且毀面垢形偷生替死隱

姓埋名者稽古不少深切慮之至逆賊旣敢叛

國則羽翼何難脅從而赤身百姓尤出不敢抗橫

者又理所必至要當原諒况

朝廷命師討逆原爲救民水火今若不分百姓妻女

一槩入營卽使城開無民

國家要此空地何用此又微臣以封疆切重責任攸關又不得不再爲請

旨者臣愚以爲如係攻開之城所得之人或不論兵民男婦一槩分散爲奴可也如係投出之人係民或當發有司安插係兵或當候

旨發落至已前入營婦女幼小大將軍等雖在嚴禁然四路大兵雲集迤西追兵遠竄臣請再加

天語再下

嚴勅如的係賊兵之妻女幼小准其在營如係民人

之妻女幼小查明來歷當發還民間使其完聚不獨起目前之瘡痍固將來之邦本而萬里遐荒百蠻重地首要得民之心庶邊徼巖疆從此奠安於無事矣臣鯁鯁過慮無非欲安全黎庶蚤奏蕩平然愚昧淺見是否可行伏候

皇上仁明乾斷

勅下大將軍等暨諸叅贊從長再議非臣所敢擅必也緣係

報明官兵留用地方糧餉重民生以固邦本貼黃難

盡伏乞

睿鑒全覽

勅議施行

恭謝 欽賜書經解義疏
奏爲恭謝

天恩事據提塘官張承禧領出

欽頒書經解義一部交臣子趙弘燮附順差齎到成

都因臣進兵於新鎮復取關山象嶺再抵建昌

差官往返於九月初三日始到武定臣當卽望

闕叩頭謝

恩祇領訖念臣邊鄙武人碌碌戎馬雖學古有懷不

過粗識章句而於二帝三王之要旨平章協和

之盛化未能窺測今莊誦

聖製大義燦著修齊治平之規模聖神文武之全體

言雖博而理則一道相承而統在中臣白顧何

人幸逢

曠典敢不永佩

典訓靖共臣職用以教子傳家竭忠

帝室宣力

皇朝以少答

隆恩於萬一耳謹具奏

謝以

聞

恭報得獲滇省外護情形疏

題爲恭報微臣親統官兵克取滇城外護情形事
案照臣前遵大將軍貝子等衆議令臣統兵進
取南壩新橋一帶地方并臣與官兵情願効力
緣由已經

題明外今臣於本月二十二日夜親身督兵敗賊
進占玉皇閣將軍叅贊臣穆占統兵兼督而新
橋止隔一箭之地逆賊於沿堤一帶修砌牆垣
高築砲臺自得勝橋拖船舖新橋土橋小寨口

起至西海子止沿長十餘里重佈鎗砲嚴加設
備又河堤係條石砌成齊崖水深丈餘橋口實
砌堵塞官兵直攻兩日無可入手臣見火砲果
多遂傳令官兵預備釘板長梯以及草網暗行
躡水度崖寬窄而用於二十五日夜二鼓時總
兵鄒九疇瞿洪陞等得渡而過兵分兩路一出
其左一攻其右大破逆賊奪取新橋上橋兩要
關口催兵前進并取雙塔東寺西寺直追至三
市街連敗逆賊追殺入城兵抵城下臣再思得

勝橋在我兵之後難容逆賊據守復遣總兵藍
兆周張友成等東擊亦已敗賊克取而南關一
帶地方俱爲我有外護旣得內城自危滅賊不
遠臣已督兵於東寺西寺挑修壕牆梅花椿安
營二座於三市街安堆緊逼南門惟候四面官
兵齊集近城應作何克取攻戰自候大將軍調
度所有傷亾官兵以及擒斬逆賊并得獲大砲
交鎗軍器等件查明另爲彙報謹將官兵克取
外護情形理合

題報伏乞

睿鑒施行

恭報克復雲南省城疏

題爲題明事竊臣於十月二十五日夜連破逆賊
奪取新橋土橋追殺過雙塔東寺西寺直至三
市街復取得勝橋逼城安營緣由已經具題
報明矣查二十六二十七二十八等日逆賊城頭砲
火與官兵尚在互相擊打二十八日夜二鼓城
內火起而守城賊兵猶然照常不亂四鼓南門
城頭弔下一人名喚陳起龍報稱內府左將軍
糾衆擒拏郭壯圖而郭壯圖見事急自刎而死

各官請討免死牌獻城投降等語又云不及寫
文用印書名綾子爲信查印文一係內府左將
軍書名吳國柱一係金吾龍威右將軍書名吳
世基不多時又從南門城樓傳出云洪化差例
侍衛前來請西寧李總兵說話卽傳總兵李芳
述同隨征遊擊姚思文前去而李芳述姚思文
到彼又似有人着去東門講話之說及李芳述
回稟見過林天擎吳國柱何進忠線緘等請將
軍同蔡將軍講話又問洪化亦死郭壯圖父子

自刎各官請降與差官陳起龍前話相同又得
勝橋爲東門正路且出臨近而東門人多爭講
不一等語臣思郭壯圖洪化旣死諸人不過獻
城投降旣彼如此若與爭講萬一僨事關係不
小臣遂止李芳述不必再去止將陳起龍所報
并印文送大將軍貝子驗看說明訖午後將軍
總督蔡毓榮引林天擎吳國柱何進忠線緘黃
明等赴大將軍貝子營盤來見當衆剃髮頒賞
袍帽謝

恩訖大將軍貝子六門安兵凡城內一應清查事宜
着線絨等造冊令蔡毓榮料理臣等各散今開
東門北門出入單將南門緊閉漢兵俱令撤回
而臣亦將東寺西寺之營撤回原守壕牆汛地
訖再查二十六日下晚大將軍貝子差叅贊臣
穆占巡撫臣王繼文赴臣營言說貝子說得勝
橋原派與蔡將軍官兵取他的官兵多日不能
取將軍取了是將軍的功但他的兵多將軍的
兵少將得勝橋與他守罷等語臣以大將軍貝

子盼附敢不遵奉遂將臣下總兵藍兆周張友
成官兵當卽撤回將地方交與將軍蔡毓榮官
兵訖在臣前讓得勝橋今不與東門爭說總是
公心公念以

國事爲重也而郭壯圖見兵臨城下事在緊急遂
發火燒家父子自刎而洪化隨之至林天擎吳
國柱何進忠線絨等量力不能支自出投降八
年巨寇今日滅亾總皆我

皇上洪福齊天

國家威靈所致四海臣民咸頌蕩平之功百蠻重
地永享敕寧之福臣惟有稱慶歡忻而已夫復
何言獨是吳三桂有敵

國之富有欺

天之罪其財產一應以及人口官兵理應入官須當
切實查明請

旨定奪而蔡毓榮旣肩任其事自難委卸於人伏乞
皇上嚴勅蔡毓榮着落林天擎吳國柱何進忠線絨
等徹底清查一一報出不許欺隱不許朦混在

大將軍貝子等自有酌定無待臣言多贅但臣
旣係雲貴總督若不預爲

題明分割其事恐滋將來之咎是以不避嫌怨急
爲陳請緣係題明克復省城併一應事宜貼黃
難盡伏乞

皇上睿鑒全覽

勅議施行

南服已靖再請休致疏

奏爲南服已經蕩平臣年已經衰老勞怨日深疾
病日重實難勝任謹援例乞休仰祈

睿鑒俯允以重巖疆以安餘生事案照臣前以滇黔
極邊重地素稱難治臣之才淺望輕年老有病
緣由繕疏備陳控辭尚未奉有

俞旨迄今悚惶待

命念臣一介武夫碌碌庸才荷

國厚恩捐軀難報是前首倡具疏期在滅賊朝食

上慰我

皇上宵旰之憂下盡微臣犬馬之報卽今甫到雲省
急言三事蚤期取城而親身深入逼賊城下奪
其外護扼其喉吭賊知勢不能支而元兇伏誅
餘孽請降一腔報

國之愚忠仰仗

天威全始全終耳今天下自此太平矣人心自此大
定矣而臣首倡之一念亦已盡矣獨是總督責
任重大巖疆地方緊要臣實年老臣實才踈况

疾病時發勞怨日增精神恍惚脾胃不寧兼以
腰腿疼痛步履維艱眼目昏花耳復重聽伏乞
皇上念臣因公招忌鑒臣情出至切准照年老例休
致放歸田里以終餘年俾臣得與田野齊民含
哺鼓腹謳誦

聖恩共享太平而衰病之身或不致卽填溝壑皆出
皇恩之所賜至於

君恩深重罔極未酬臣當勉教三子竭力効忠繼臣
圖報未竟之心耳臣謹迫切再爲

上陳仰祈

睿鑒俯允施行謹具奏

聞

題報發回秦省官兵疏

密題爲報明公會議等事康熙二十年十一月十一日准兵部密咨前事內開該議政王等會覆勇略將軍雲貴總督趙良棟題前事等因康熙二十年九月二十四日題十月十三日奉

旨議政王貝勒大臣會議具奏欽此該臣等會議得勇略將軍雲貴總督趙良棟疏稱今大將軍貝子章泰等公會議得雲南圍城官兵已足糧米不敷如前後官兵俱集省會恐致枵腹將臣

所統進定雲南一路漢兵量留五千分派圍城其餘盡數發回陝西臣行調領兵鎮將等官查明已到雲南兵數填給糧單補給月餉并議遣發回陝應由某路而原留四川守隘以及沿途患病未到官兵又應如何撤回均俟各官議明另爲題報等因查現在雲南滿洲綠旗大兵需餉甚是浩繁今各處逆賊盡行勦滅地方俱已平定相應將將軍總督趙良棟統領進勦陝西兵丁暫留將軍總督趙良棟處五千員名俟雲

南省會一得卽行發回陝西防守汛地其餘官兵應如所題速行發回陝西固守各汛地方將軍趙良棟旣稱伊帶留川守隘以及沿途患病未到官兵作何撤回之處酌妥另疏題報等語應毋庸議等因康熙二十年十月十六日題本月十九日奉

旨趙良棟自有該督標經制官兵其原帶陝西征勦雲南官兵勞苦已久應盡行發回陝西着再議具奏欽此該臣等再會議得先經臣等會議將軍總

督趙良棟統領進勦陝西兵丁暫留將軍總督趙良棟處五千員名俟雲南省會一得卽行發回陝西其餘官兵速行發回陝西將軍趙良棟旣稱伊帶留川守隘官兵作何撤回之處另題等語應毋庸議等因具題奉

旨趙良棟自有該督標經制官兵其原帶陝西征勦雲南官兵勞苦已從應盡行發回陝西着再議具奏欽此查將軍總督趙良棟標下自有經制官兵其原帶陝西征勦雲南官兵勞苦已從應盡行

發回陝西

上諭甚爲允當應欽遵而行其將軍總督趙良棟原帶陝西進勦雲南綠旗官兵作速盡行發回陝西固守各汛地方將軍總督趙良棟標下官兵照原額補設此補設兵丁將前任雲貴總督標下隨征進勦兵丁補入如有不敷將雲南投誠食餉兵丁補入兵丁旣經補入其官員應令將軍總督趙良棟遴選能員具題補授至陝西省切近邊疆關係最爲緊要趙良棟所帶進勦留

川鎮守要隘官兵總督哈占派撥四川官兵防守將此陝西官兵亦速行發回陝西固守地方可也等因康熙二十年十月二十一日題本月二十五日奉

旨依議欽此爲此合咨貴將軍煩爲欽遵施行等因到臣該臣查看得前大將軍暨諸叅贊公同會議將臣原統自川進滇一路陝西漢兵發回止留五千名分定壕牆汛守圍城聽臣具題而臣正在查議遣調間適接部文欽奉

上諭嚴切攻城而臣與官兵情願効力大將軍等公議再挑兵五千名合前兵五千名共一萬之數令臣先進重關下營攻取得勝橋不期未待調兵到省次日遂改前議令將軍總督蔡毓榮官兵前去及臣兵到先取南壩敗賊復取玉皇閣再破壕牆取新橋土橋并雙塔直至三市街又取得勝橋連破逆賊緊逼城下安營而吳世璠郭壯圖自盡全城悉降已經題報在案今准部文欽奉

上諭陝西官兵勞苦已久盡數發回臣查明實到雲南武定一帶官兵數目填給糧單於本年十一月二十等日仍由原路挨營起發前行回秦外其成都黎州越嶲冕山建昌各處留防官兵以及沿途染病并死各數目嚴行各官清查撤調實在開除故徑報四川司餉衙門及川陝督臣清楚糧餉外至臣前疏

題明在川歷過之日於川省支領入滇之日在滇支領今准學士臣佛倫等言稱大兵雲集兵餉

不接又將在滇之十月十一月兵餉鹽菜等銀不能全給臣只得將支過欸項與未支欸項一開明咨送戶兵二部暨四川巡撫訖再查原調靖寇標食半俸副叅遊都楊正剛劉呂時卜大雄易尚德等二十七員原係隨兵數前來征川入滇者今各官情願報効於雲貴督標軍前臣謹

報明留用合并敘明爲此今將起發回秦官兵緣由并支領糧餉情形相應

題明伏乞

睿鑒施行康熙二十年十二月二十七日奉
旨該部知道

報明前赴曲靖疏

題爲題明事竊照雲南克復大將軍令投誠線緘
造冊總督蔡毓榮料理撥派滿兵把守六門專
人清查叛產臣等官兵撤回壕牆原守之地靜
聽已經具疏

題明在案迄今多日城內一應臣皆不知旣不敢
過問亦不敢妄

奏今奉部文陝西漢兵盡數發回是臣無所事矣
竊思臣前堅請赴雲南省城者原爲忠

君報

國滅賊朝食是以不避忌怨不惜身命督兵破賊
親逼城下扼其喉吭不三日而郭壯圖父子白
盡吳世璠自誅省城克復是臣之心已盡矣臣
事已畢矣查曲靖原係總督駐劄之地現有衙
門臣遵照舊例前赴曲靖一面料理候

旨一面據實

題明伏乞

皇上查臣前疏

鑒臣老病實真

允臣所請蚤

簡賢能任事以安地方臣民幸甚伏乞

睿鑒施行

題報起程進京日期疏

題爲欽奉

上諭事康熙二十年十二月初九日准兵部密咨前
事內開康熙二十年十一月二十三日奉

上諭將軍總督趙良棟同大將軍等來京陛見欽此
爲此合咨貴將軍煩爲查照

上諭內事理欽遵而行等因到臣念臣自丙辰叩辭
闕廷不覲

天顏於今數載雖謁蹶愚忠滅賊以報

國而瞻

天仰

聖之思時切於懷今奉

恩召入京犬馬依戀之心得遂而臣一腔愚悻或亦

可以自陳於我

皇上聖明之前矣既奉

君命應卽星馳就道臣隨擇於本月十五日起行發

文後接准大將軍等文在康熙二十一年正月

初十日自雲南起行臣思又不便相去太遠遂

改期擬於本月二十七日臣自曲靖量帶人丁

起身赴

京理合先爲

題明伏乞

睿鑒施行

Blank columns for the main text of the document.

請明先後進京日期疏

題爲請

旨事竊臣欽奉

上諭同大將軍等來京

陛見大將軍等與臣文擬於康熙二十一年正月初

十日自雲南起行臣以

君命爲重不敢遲緩又且不帶官兵自難一處下營

遂擬於康熙二十年十二月二十七日自曲靖

府先行業經具疏

題明並文報知大將軍等在案今臣於本年二月十二日抵鎮遠府已出雲貴之境而大將軍等尚在雲南未會起身又聞貴陽養馬二十日襄陽養馬二十日如臣既不帶兵又不養馬自不便於長途久住等候或念臣既已前行准臣先為進

京或臣應於途次地方等候一同進

京臣未敢擅便相應請

旨伏乞

皇上睿鑒施行康熙二十一年二月十七日奉

旨兵部議奏

請敘入川官兵功績疏

題爲官兵首倡入川獨當一路先取成都省會旣

下全蜀始定功苦已蒙

聖鑒至今尚未邀

恩仰祈

勅部議敘以彰

大典以敷

皇仁事案查臣首倡進兵在康熙十八年四月二十
二日寧夏所拜之疏也爾時在陝諸臣皆不願

進兵難逃

聖明洞鑒至取興漢畧陽之後欽奉

上諭特遣學士臣希福下問收川之策而臣條奏兩路進兵又在康熙十八年十一月二十二日畧陽所拜之疏也是臣前後兩次首倡一力擔當者雖出臣忠

君報

國不惜身命而其間得心應手者實藉官兵之力也如臣於康熙十八年十月初二日自清水縣

進兵以五千官兵獨當一路奮勇直入不十日而取徽州又浮水渡白水江敗入堵山賊衆取畧陽在諸路之先再取陽平關奉有

陽平關逼近寧羗係入川之路沔縣與漢中相近觀提督趙良棟恢復徽州直取畧陽陽平關意欲進定四川亦不可定若進定四川則滿洲大兵不可不隨繼其後之

上諭是官兵之勇往直前期在滅賊我

皇上蚤已洞照矣又寧羗至成都一千四百餘里臣

於康熙十八年十二月二十六日分兵十九年
正月初一日於白水壩浮水渡江大破賊衆直
追前進初十日克取成都不但青川敗賊石峽
溝敗賊青箐山敗賊明月江敗賊綿竹敗賊僞
將軍總兵追急就降抑且十日而至成功可謂
深入可謂神速况奉有

趙良棟若不克取成都保寧如何而得若不攻取
保寧成都如何能守之

上諭是成都保寧兩路官兵功苦我

皇上明照萬里又蚤已洞鑒矣而部議保寧一路官
兵功加十等成都一路官兵功加一等豈成都
爲省會又係先取反不嫌保寧而十等一等若
是之懸殊耶不獨官兵難安亦非

皇上聖意且保寧一路官兵議敘業經兩年照銜食
俸照銜陞官沾

恩亦經兩年而成都一路官兵同時同事竟不獲一
例沾

恩是臣又不得不據實代爲請

命也伏乞

皇上軫念首倡官兵深入取川拚命守川又復進定

雲南効力實深於諸路功苦實倍於諸路

聖恩准照諸路一例優敘激勵人心以收後効官兵

幸甚康熙二十二年四月十五日奉

旨議政王貝勒大臣會議具奏

請敘平滇官兵功績疏

題爲官兵奮勇大破逆賊奪取外護直逼城下拏

門扼吭逆衆勢窮人心始亂渠魁事急自盡城

開有據事實難掩臣謹遵

上旨備敘前情指明證據并繪圖本具

題伏乞

睿鑒勅下議敘以重賞罰以勵後効事案查臣於康

熙二十年九月十六日抵雲南歸化寺下營見

我兵圍城太遠已經九箇月恐成師老糧匱之

勢十九日同在大將軍貝子營內議話臣卽言城當速取不可遲人人則明歲勢必無糧大爲可慮并陳進壕近城奪取外護險要及嚴禁兵丁出入三事學士臣佛倫侍郎臣金鉉內院臣薩海顧巴代將軍叅贊臣噶爾漢等可證可問十月初三日接准部文欽奉

上諭令急急攻城仰見我

皇上廟算無遺明鑒萬里於本月初六日在督臣金光祖營內會議進壕取險派定臣下現在營盤

內兵五千再去武定調兵五千共合一萬之數留四千守壕牆臣親統六千前進在重關下營進取得勝橋調兵往返限五日到營十一日兵至十二日四面一齊進取此初六日大將軍臣賴塔親口分派亦大將軍貝子暨叅贊諸臣公同會議又臣再三請問說明衆口一詞者也至初七日大將軍貝子更改前議令督臣蔡毓榮下官兵進重關下營取得勝橋各營滿漢官兵俱往重關幫助挖壕卽臣下官兵亦分有丈尺

挖過壕牆而督臣蔡毓榮官兵自初七日在重
關安營起至二十日止計一十四日未取得勝
橋二十一日又公議令臣統原議兵數進壕破
南壩之賊取雙塔二十二日二鼓臣親統臣下
官兵并雲南撫標兩營官兵先進四鼓將軍臣
穆占統領滿兵後進臣親督官兵殺敗南壩玉
皇閣一帶賊衆奪玉皇閣安營緊逼新橋相離
賊壘一箭之地逆賊郭壯圖不容我兵扎站親
督賊衆過橋迎敵與我兵互相衝打砲火如雨

竟日不退臣親身同穆占督兵而穆占眼見至
穆占於酉時分統領滿兵仍回大營而臣新安
營盤壕牆未及挑挖完備逆賊明攻暗襲突犯
數次臣與官兵擐甲以待力敵鏖戰交鋒一夜
次日大將軍令先鋒沙哈納帶八旗官兵苦獨
力將臣營未及挑完壕塹協同挑挖而大將軍
暨各叅贊督撫諸臣俱來看過查雲南省城正
北西北係銀錠山正西西南係海子卽昆明池
也逆賊自東北起至西南沿長一帶藉得勝橋

新橋土橋一道大河一道大渠將海子水引入築壩聚水爲護城外勢復於彼岸築牆砌堞安設砲臺拒守在得勝橋新橋土橋一帶安營臣見逆賊設備嚴密鎗砲重加而城頭之砲更準更密我兵白晝明攻數次傷亾甚多實難用力因賊夜來襲我營盤臣將計就計於二十五日夜用兵明攻正橋上流稍空之處以釘板令兵暗渡而暗渡官兵一過賊遂驚潰我兵奪橋追殺至雙塔逆賊聚衆接戰至三市街又聚死戰

俱被官兵奮勇殺敗追入南門再分兵東向攻取得勝橋將賊殺入東門臣遂在東西二塔得勝橋安大營三處又於三市街西南角東南角俱各安兵守要離城一箭之地當卽報明兩大將軍暨學士侍郎臣在案先鋒噶喇昂邦沙哈納署副都統達漢太等帶領滿洲大兵前來安營協力二十六二十七二十八三十城頭砲火如雨逆賊情勢猶欲出城拚命死戰見我官兵晝夜嚴防用大木將街口截斷旋卽挑壕知勢

不能爲而人心始亂郭壯圖始於二十八日夜
放火燒家自縊吳世璠隨亦自誅二十九日城
開此皆我

皇上天威遠播廟謨制勝

國家洪福所致而兩大將軍調度暨在滇三路滿
漢官兵之力臣何敢獨言其功但取險破要不
三日而致城開實臣下官兵之力也况臣力言
於先而臣下官兵復奮力於後是三軍之奮勇
用命臣又不便於默默者矣至得勝橋係將軍

臣穆占巡撫臣王繼文要去與督臣蔡毓榮者
穆占現在撤回臣下總兵張友成藍兆周現在
而差去撤兵守備高登科現在卽大將軍亦可
問可對查得勝橋爲東南二門總路如不取得
勝橋東面官兵必不能近城此臣親統官兵敗
賊奪險開城始末情由學士臣佛倫侍郎臣金
鉉內院臣薩海顧巴代將軍臣噶爾漢先鋒臣
沙哈納察漢把兔兒撫臣王繼文副都統臣達
漢太等諸臣可問可證竊思官兵者皆係

皇上之官兵賞罰者皆係

皇上之賞罰

聖明之前理難欺掩今湖廣官兵從優議敘加十三等矣而臣下官兵直入取城竟未議敘因官兵屢屢訴功臣只得指實面

奏已蒙我

皇上洞鑒微臣之愚悃官兵之勞瘁令臣具疏陳明臣謹備敘前情指明證據并繪圖遵

旨具

題伏乞

皇上睿鑒勅下議敘施行康熙二十二年四月十五

日奉

旨議政王貝勒大臣會議具奏

竭効愚忠疏

題爲密陳愚忠仰報

恩遇萬一事竊思方今天下昇平

聖主當陽萬國咸服惟噶爾丹狡妄跳梁侵占鄰藩
蕞爾小醜覓食野賊不過以殺搶爲強全無信
義其糾合之衆總是挾從之徒原非根本之旅
得勢隨而爲用失勢轉而爲讎易於離散兵旣
無根糧尤無繼而其舉動不過六七八月馬匹
壯牛羊肥利於速戰在我之爲將者要當先思

破賊之法先製破賊之具審其地勢過其要隘
挫其鋒銳不容施展加以臨事而懼好謀而成
可戰則戰可守則守發縱在我期於必勝至於
以逸待勞兵家所貴總在神於運用也如我
皇上念天時寒冷將兵撤回歸化城採聽信息休兵
養馬以逸待勞深得用兵取長之法再如四十
八家爲我之藩籬而喀爾喀又爲四十八家之
唇齒不可不顧但緩急進止主客先後破賊當
用智取又如湖灘河所建立倉廩蓄備餼糧歸

化城訓練蒙古用內大臣爲將軍右衛駐鎮滿
兵專設將軍仰見

聖明籌畫弘遠從此兵省往返之勞民免運送之苦
神機一發可懾賊人之膽而宣大山西漢兵更
當整練兵須名名切實馬須一一臚壯戰則協
同大兵出力守則固其邊汛不可不重至於陝
西爲天下之形勝陝西之重要在三邊而防邊
備邊全在官兵查陝西六鎮經制兵八萬如果
足數實切訓練兵將合心儘可爲用今處處空

糧處處扣餉卽有一二公患者又被衆相形不能自持如此則是兵不實餉不清焉望其實切訓練耶且每見諸臣初任卽請巡歷地方不知所巡者曾何補於

國所言者曾何益於公竟未見糾一貪官言一扣餉及言某處兵不訓練某處馬匹缺少不過到一地方添一番使費增一番攤扣累千盈萬皆出兵餉而言衝言要請添設官兵總是私心若肯清補空糧自不用添兵矣嚴禁扣餉亦奚用

巡查爲哉總是上下彌縫一味婪貲欺飾深負皇上特用之隆恩無事之日仰仗

朝廷威靈朦混取利偶有警息則邊地空虛戰守無賴此臣不顧忌諱鯁鯁過慮之愚忠欲陳明於我

皇上之前非一日矣倘蒙

天鑒不以臣言爲謬立除積弊蚤爲補救必使空糧嚴切清出從實開報叩懇

皇仁赦其已往開其自新急急召募一一補足兵旣

補足而馬尤當實備如遇倒馬隨報隨開率領
茶馬卽或兵丁恐開除加糧情願賠補准於本
兵買備好馬驗准差操不許總兵買不堪之馬
發兵藉以扣餉其兵丁每月應得之餉亦不許
指稱逢迎禮節公然攤扣而營伍不扣兵餉不
發官馬兵自強馬自壯官自清而法自行其營
中老弱庸懦應名不見餉之兵自難容留而居
閒精壯好漢自必踴躍投兵如此則營伍兵威
自振人心自服加以智勇之將三軍合力何敵

不克何地不到何功不成不獨撲滅噶爾丹一
人卽極西之蒙古有二三其念者皆可收攝其
心則三邊永固全陝奠安可免

聖主西顧之憂

禁旅大兵不致往返過勞邊民得免供應之繁卽
天下通傳而虛兵冒餉之弊亦知儆惕矣緣係
密陳愚忠事理貼黃難盡叩懇

睿鑒全覽施行

恭謝世 恩疏

奏爲恭謝

天恩事康熙三十四年五月初二日准兵部咨爲懇

辭

恩榮等事職方清吏司案呈奉本部送兵科抄出該

本部覆勇畧將軍趙良棟奏稱臣前以讒謗不

得不將巔末臚列陳明原不敢望功今蒙加

等精奇尼哈番終涉矜功受賞伏乞收回

成命等因具奏奉

占大兵征取雲南時大將軍賴塔等自廣西進擊於黃草壩石門坎地方大敗賊衆直抵雲南省城大將軍貝子章泰等自貴州統兵前進沿途擊敗賊衆亦抵雲南省城所有城內悉力出禦之賊於歸化寺地方鏖戰大敗之遂將省城圍困趙良棟等後到而首先倡議克取得勝橋着一併再行議敘具奏該部知道欽此查將軍趙良棟先經具奏奉旨恢復四川時趙良棟首倡前進着察原案議敘具奏欽此臣部議趙良棟率領官兵首倡進取四川

累次殺賊恢復地方直抵雲南勞績顯著酌量於趙良棟從前所給拜他喇布勒哈番之上再加頭等阿思哈尼哈番授爲三等精奇尼哈番等因具題奉

旨趙良棟着授爲三等精奇尼哈番餘依議欽遵在案今查大兵征取雲南時趙良棟雖後到而首先倡議克取得勝橋應將趙良棟於從前所給三等精奇尼哈番之上再加一拖沙喇哈番授爲二等精奇尼哈番俟

命下之日移咨吏部轉揭內閣撰給

勅書可也等因康熙三十四年四月二十六日題本

月二十九日奉

旨趙良棟着授爲一等精奇尼哈番餘依議欽此欽遵抄部送司案呈到部擬合就行爲此合咨前去煩爲欽遵查照施行等因到臣伏念臣前以剖明心跡荷蒙

聖主授臣世職涉有矜功受賞之愆其實懇辭更蒙我

皇上以雲南之功加臣而下首先倡議之

旨是

皇上之恩有加無已微臣之感戴至極難言而兵部以一拖沙喇哈番議加我

皇上再予一等精奇尼哈番使臣一段辭功之念不敢再控矣謹祇遵領受惟有感頌兩下倡先之溫旨銘於終身傳於後世完臣五十餘年之孤忠節操而已理合奏謝

天恩伏乞

睿鑒施行康熙三十四年五月初十日奉
旨覽卿奏謝知道了該部知道

欽召赴京恭陳下悃疏

密奏爲恭謝

天恩并陳下悃仰慰

聖懷事竊臣欽奉

特旨准假就醫江南初抵揚州再移居江寧業經兩

疏

奏明康熙三十五年正月十七日

欽差侍衛臣張文煥馳驛至江寧臣因動履不能令

人昇擡於臣寓門側俯伏叩迎侍衛臣口傳

聖旨問臣病問臣好并付臣

欽賜密諭暨人參黃包匣一箇捧至室內跪啓

密封

上諭內開

諭勇畧將軍趙良棟朕因噶爾丹比年以來怙惡跳梁侵凌喀爾喀諸部落朕視遠邇中外爲一體不忍聽其擾害藩服今聞其竄伏於巴顏吳闌地方去京師二千里去四十八固山邊境七百餘里自秋徂冬馬蓄疲瘦形跡狼狽正宜及此時剪滅之

以永弭邊患爾久著績行間性秉忠義練達機宜故茲馳驛與爾商畧爾體中稍可勉力支持卽趨赴闕廷以共悉心籌畫爾宜深體朕意并賜長白山上用人參以資頤養特諭欽此伏念微臣卽違天顏以來將及半載日在遍訪名醫冀圖蚤痊仰答聖眷無奈臣衰年朽質氣血兩虧目前浮腫雖消而左腿拘攣不能伸展兼之脾胃虛弱飲食難調以致肌膚消瘦皮骨僅存侍衛臣并撥什庫親見臣之病勢如此實實力不從心但

皇上如此

密諭下臣而臣獨何心敢再言病卽肝腦塗地赴湯蹈火有所不辭遑恤身命耶惟是陸路遙遠不能騎馬卽肩輿亦恐途長不及臣擬仍由水路趨赴

闕廷仰聽

聖訓除囑侍衛臣代爲口奏并望

闕叩頭謝

恩外謹先恭疏

奏明謹具奏

謝以

聞

奏疏存藁卷之六終

勇畧將軍總督雲南貴州等處地
方軍務兼理糧餉兵部尚書兼都
察院右副都御史世襲一等精奇
尼哈番襄忠公奏疏存藁後序
先襄忠公身親戎馬五十餘年弘
燦弘燮弘煜等自出就外傳而後

趨庭之訓最為嚴切及少長勉以
忠孝大節期以實踐躬行自壯至
老每飯不忘

君國然性秉剛直志切捐糜遭逢

聖明屢膺節鉞一切軍務機宜與敷陳
章奏謀之於心而書之於手也媿

媿不倦絕不旁諮假手即年逾七
十當疾病呻吟之際凡有封事皆
口授書錄重加檢視方始繕

聞其敬謹蓋如此荷蒙

聖主優容事事嘉納

錫賚頻加

恩榮備至畀以世職及弘燦叨鎮黃巖
弘燮觀察津門忽聞

先襄忠公凶問徒跣奔歸苦凶之
餘見有手定奏疏存藁六卷劄劄
於江南就醫之日蓋亦檢點行笥
錄其攜存者耳嗣沐

皇上殊恩舉揚名之盛典

御製碑文疊頒

諭祭

寵錫莖金微勞寸績備荷

嘉揚鐫之貞珉垂示不朽恩流泉壤榮
及子孫而弘燦等兄弟菲材陋質

悉蒙

聖恩弘燦五叨重鎮兩任提軍復拜總
督兩廣之

罷命弘燦由邑令而歷觀察方伯巡撫
天中復調畿輔重地弘煜越格超
遷

命守維揚弘煒年未及壯

許侍禁廷此皆

皇上垂念舊臣

隆恩異數施於一門者有加無已然弘
燦等兄弟撫心慙媿竭頂至踵圖
報難盡者矣伏讀先襄忠公自製

序文原以留之弘燦等兄弟子孫
勉以忠

君報

國不啻朝程而夕督也爰敬裝成集
日夕莊誦儼承嚴父之訓誨以報
高天厚地之

國恩子孫奕世其時時警惕於寤寐
庶幾繼緒承先以毋忝忠孝貽謀
之志願也夫

男弘

燧 燦 燮 燁 燄 燧

敬識并書

